

至以該曹為誤計欺罔入啓牒報於該曹極為汎濫請內需司  
行首掌務官令攸司推考痛治近來疊年凶荒國儲不裕至於  
朝士職田亦不得給居僧位田以職田一例皆已不給而獨於  
居僧位田特命題給有累 聖治物情極為未便請還收成命  
近來習尚不義陵慢成風下官不教上官等級之紊體統之失  
弊將難救此習日長所關非輕不可不革監司乃古之方伯其  
於守令名位有截為守令者不可少有陵侮之心惟新縣監李  
瓘憤其殿最之居中監司柳智善巡到其邑因其不關之事移  
怒於帶率營吏將加嚴杖邑吏輩以前時所無之事脅行告爭  
遂捉致營吏之妻嚴加捶楚致令監司被其脅制無言退避中  
外聞之莫不駭愕請李瓘罷職以懲陵慢之習柳智善以一道  
之主專黜陟之任而受制於守令反為退避之計至於稱病呈  
辭大失事體請推考答曰內需司行首掌務官因舊例入啓豈  
可謂聽兩宗之囑乎勿推位田事與答府同柳智善推考李瓘  
罷職如啓○日微暈夜異方東方如火氣艮方雷動電光坤方



如火氣

戊申 上御朝講○供饋衛社功臣于闕庭賜一等樂

史臣曰時勲臣等以同盟之故並荷恩眷權同骨肉而酒食相徵逐殆無虛日皆以元衡為宗主凡有作為必稟而後行之以致權侔於上而一國威福都在其手可勝痛哉明胤不足數也麒麟壽躡稱儒士而承風順旨曲為阿附其私謂之頻情好之為人莫敢問其間云

○京畿利川喬桐癘疫熾發監司請設醫官齎持藥物救療從之

己酉 上御晝夕講夜對○日暈兩珥夜東方巽方乾方西方如火氣

辛亥 上以京畿清溪寺奴貴石等上言下于政院曰京畿僧人築城處則役之曳木軍及造紙者軍則勿役使無民弊事言于備邊司及該曹自古僧徒非如有妻子根著之人俱以無賴乞食之輩有苦役則為散而逃將有大弊故 先朝役僧之時